



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

Dubai Tennis Championship: Mirra Andreeva-i Iga Swiatek tsükdaktsü

Zelensky-i ali rongsen atema tezüngzüktep yanglutsüla: Mike Waltz

VOL. XXII ISSUE NO. 129 (ADOK 129) DIMAPUR KÜPTOKNÜ (SATURDAY) TSÜKLAI (FEBRUARY) 22, 2025 ₹ 5.00

Arunachal Christian Forum-i APFRA agientsü akhanger

Itanagar, February 21, 2025

(Agencies): Arunachal Christian Forum (ACF)-i Arunachal Pradesh Freedom of Religion Act (APFRA), 1978 meyipa agitsü takhangba agüja lungkak aitba sentong tuluba tenzükogo.

Arunachal Pradesh Home Minister Mama Natung aser Law Minister Kento Jini na den ghonda ana jungnüa senden amenba sülen ACF President Tarh Miri-i Itanagar nung osangbener den ajurua jembia liasü.

"Senden nung telemtetba tajung kecha magitet aser iba jagi onoki lungkak aitba maparen ulushir. Iba ozüng ya Khristantem anema lir kechiyong state nung Khristantem ya lisopurtem rongnung mezüngoker" ta Tarh Miri-i ashi.

ACF-i iba Act anema ozüingi melaba ama lungkak aittsü aser March 6 nü budget session den külemi Legislative Assembly anasa lungkak aitba sentong ka

agitsü ta metetdaktsüogo.

"APFRA ya lisopur sobaliba kümzüka ayutsü atema lir. Iba ya tamangba yimsü kecha anema masü. Asenok tamangba yimsü balala süaka asenoki külem lisopur maitsü lemsateper" ta Arunachal Pradesh Chief Minister Pema Khandu-i ashi.

"Iba Act ya 1978 nung yangluaka merenmetet aser tapak ana draft asüba den implementation rules kecha meyanglu. Gauhati High Court-i tawa tu state sorkari dang ita trok tsüngda iba Act indang rules renemtsü mapang züngzüksü. Iba Act ajanga Hindu, Buddhist aser Christian tem dena tamangba yimsü kecha balaka mebandangtsü" ta CM Khandu-i ashi.

APFRA ajanga sorkar aser tamangba yimsü teloktem tsüngda obang meputep adoka lir. Khristan teloktemi iba Act ya tamangba yimsü bendanga amshitsü atema yangluba ta züngshir.

Mkg DC-i lung poksatsü temelaba agütsü

Dimapur, February 21, 2025

(TYO): NH 61 (New NH 02), Angetyongpang Tzu River tesem nung D.E.F Police Church nungi Yisemyong tashi lenmang yanglutsü atema lung poksatsü temelaba agütsüogo.

Mokokchung Deputy Commissioner Thsuvisie Phoji-i JKM Infra Works LLP Guwahati, Assam nem iba mapa inyaktsü temelaba agütsü.

February 22, 2025 nü

contractor-i iba mapa inyakdang public taküm aser kiojen kümzüka ayutsüla aser Explosives Act/ Rule, 2008 nung lateta aliba ama inyaktsüla ta Mokokchung DC-i metetdaktsüogo.

Iba mapa inyakdang nisung taküm samatsüsa mesüra kiojen raksatsüsa lendong ajurura JKM Infra LLP-i iba tebilemstü khuret abentsü. Iba temelaba ya February 22, 2025 anogo atema dang agütsür ta DC Phoji-isa ashi.

Congress-i 2028 dak rangloker akangshitsü meranger

Dimapur, February 21, 2025

(TYO): Nagaland Pradesh Congress Committee (NPCC)-i state ajungalen sema party tashi itshiba mapa inyaka arur aser tanü tanishirtemi Nagaland atema AICC Secretary incharge Christopher Tilak-i anir tanishirtemi Phek district semdangogo.

"Nagaland nung sorkar tasen ka nüngdakba agütsütetsüsa Congress party akangshitsüla. Tang state ajungalen sema senzüba sentong ya iba asoshi mera ka agiba lir aser mapa akokba lennirtem jangjatetsü aser tashi agütsütsü nükjidong lir" ta Working President, NPCC Khriedi Theunuo-i ashi.

"Congress-i tayongzüka aika ajuruogo saka küm 100 tema liteta arur. Nagaland nung küm 20 tema opposition nung dang liaka taoba General Elections nung Congress-i takok tulu

nguteta liasü. Congress-i tejakleni aotsü aser ajak dendakja inyaksangshia aruba senmang ajanga iba takok angu" ta Christopher Tilak-i ashi.

"Asenoki tangatetba shitak ajungkettsüla aser BJP-i telesa yur inyaksangshiba anema noktaksüla. Nagaland nung tanü ochimashi agi sünga lir aser Congress party-i dang iba inyakyim agentetstü" ta pai ashi.

"Asenoki tebilemstü onüktem jembiba dang masü saka item ya koktettsü lenmangtem bushiteptsüla. Congress party atema 2028 dak rangloker inyaka aotsübaji kanga tasak asütsü saka süngjang atangtsü, kechiyong vote enoktsürtemi tang aliba sorkar tamakoktem metetogo aser taruba election nung temelenshi atema vote enoktsütsü ama bilemer" ta MP aser PCC President S. Supongmeren Jamir-ia ashi.

"Land of Fortunes" ta jalokja Meluri district kümtetogo



Dimapur, February 21, 2025

(TYO): Meluri District Nagaland nung district 17 buba kümogo aser iba ya Hokolbarnü Chief Minister Neiphiu Rio-i sentong ka nung official süa jatetstüogo.

Meluri ya Phek district kübok Additional Deputy Commissioner headquarter ka liasü aser November 2, 2024 nü full-fledged district ka ama ajungket.

Iba sülen February 21, 2025 nü Pochury Hoho-i district administration den yaritepa 'official inaugural function' ayongzüka agiogo. Iba sentong nung CM Rio-i tetushi süa jaoker ka ama shilem agiogo.

"Chakhesang Public Organisation (CPO) aser parnok tanishirtemi district akümtsü 'No Objection Certificate' agütsüba

atema tenüngsang agütsür. Chakhesang aser Pochury nung den ano tanünga Naga nungter tsüngda telongiem alitsü atema maneni inyaktsü ayongzüker" ta pai ashi.

Küm 67 tejakdang Meluri nung administrative center ya amenoka liasü aser iba ya 1958 nung Chairman Bench Court lapoka tenzük. Meluri dang "Land of Fortunes" ta jaloktsür kechiyong iba district nung ali rongsen jenti moaja lir ta CM Rio-isa ashi.

Meluri district tasazük ya 1,011 sq. km (approx) lir aser yimtsüng 34 tashi lir. Meluri nung Shiloi Lake, Tizu River aser Trade Centre Avakhung lir ta paisa shisem.

Iba sentong nung Chief

Minister Rio-i nüngshilung ka sayatsü aser Multidiscipline Sports Stadium lapoktsü.

Local MLA & New & Renewable Resources and NSDMA Advisor Z. Nyusietho Nyuthe aser Pochury Hoho president Chonpa Jurry nati o jembidang Rio-i aniba sorkari district jenjang nung Meluri ajungketba atema pelaba metetdaktsü.

Tenaprongi district nung tekaratiba nung terenlok bener arutsü atema akokba tashi yariteptsü nangzük.

Power & Parliamentary Affairs Minister K. G. Kenye aser CPO president Vezühu Keyho natia o jembidang district tasen ajanga Pochury nung temaba jenjangi atutsü ta moatsü.

Aranbam Tengol züngsemtem densema nisung 34 apu

Imphal, February 21, 2025

(Agencies): Manipur nung counter-insurgency operation (CIO) tulu ka inyakdang sepaitemi nisung 34 puogo. Parnok rongnung kaketshir 10 aser Aranbam Tengol (AT) züngsem 26 dena lir.

Governor Ajay Kumar Bhalla-i tawa tu sensotem dang anogo tenet tsüngda auyaba prangpongtem meyipa agütsütsü mepishiba sülen sepaitemi iba mapa inyaker.

Kakching district kübok Janjao-Panung foothills nung mita aodang Assam Rifles-i AT züngsem 26 den Class X aser XI tatidang tagütsüdak kaketshir 10 apu.

Ajisüaka, Meira Paibi temi lungkak aitba sülen Assam Rifles-i kaketshirtem police station ket nung agütsü saka AT züngsemtem parnok ket nung yua lir.

Imphal West kübok Koutruk foothills nunga Hokolbarne

village volunteers 8 apu. Iba tesem ya Kangpokpi district anasa lir aser tang tashi parnok police ket nung magütsü lir.

Nisungtem apuba anema Kakching aser Lamsang nung lungkak aitba sentongtem agiogo aser Meira Paibi temi tatemzüka kecha melii chiochtsü takhangba agütsür.

Imphal East, Imphal West, Thoubal, aser Kakching district tem lungkak aitba sentongtem agia liasü.

Supreme Court-i nashishi ken o atema Assam sorkar artsü

Guwahati, February 21, 2025

(Agencies): Assam sorkari mapa tajungtem inyaktsü melena meat transporters dak ang temulung agüja inyakba atema Supreme Court-i ashishiteper.

Transporter kati packaged raw meat belenba atema Justice AS Oka aser Justice Ujjal Bhuyan na adenba bench-i interim relief agütsüdang state sorkar den ashishitep aser tartsü o kar ashi. State sorkari ibala nisungtem arrshitsü melena tanga mapa tajung aika inyaktsüla ta SC bench-i ashi.

SC-isa iba transporter anema ozüng alema ken o tem benoka aliba sota ayu aser iba ken o April 16 nü angadangtsü anogo

shimogo.

Ketdangsurtemi 'packaged raw meat' nungi shiruru balala indang shi bendangtsüji kanga tasak ta SC bench-isa ashi.

"Kodaser nisung kati nashishi danga ta shitetstü. Tenük agi anguba dang agibo kechi shi'ar ashitsü makok" ta tenati ashi.

Iba ken o nung tai tonglokja alisang ya warehouse owner ka lir aser pai packaged meat belenba dak alaka packing mesüra production nung shilem kecha mali ta shiogo.


Iba nisung yagi shi ayoker ta state sorkari ashir saka SC bench-i iba ajanga pa Assam Cattle Preservation Act nung Section 8 kübok aitsütsü makok

ta meyiptsüogo. Section 8 ajanga temelaba melii nashishi ayokba noktanger.

"Iba Section nung nashishi ya jangjatsübaji kanga tongtipang lateta lir. Idaki packed items indang shia lir. Pai shiji pack asüba masü. Warehouse lir saka idakji yua aliba atema pa manufacturer ka masü. Pai shiji pack masü" ta Supreme Court-i ashi.

Shiji pai packaged asünunga pai nashishi ta metet asü memetet ibaji jangjatsüla. Bombay High Court nung iba mesükba ken o ka nung iba section kübok "knowledge" ji kanga tongtipang ta oshidang agüja lir ta Supreme Court-isa Assam sorkar dang ashi.

Regional Transport Authority Dimapur senden amen



Regional Transport Authority (RTA), Dimapur indang board senden February 20, 2025 nü Deputy Commissioner, Dimapur indang office chamber nung amendang tangokba noksa ka yangi angur.

Dimapur, Tsüklai/February 21 (TYO): Regional Transport Authority (RTA), Dimapur indang board senden ka February 20, 2025 nü Deputy Commissioner, Dimapur indang office chamber nung mena liasü.

Iba senden ya Deputy Commissioner, Dimapur, Dr. Tinojongshi Chang, NCS lenisüba kübok amen, shiba RTA indang Chairman ama lir, aser senden nung board züngsem aser teshimtet nisungtem dena liasü.

Senden nung transport dak sendakba tongtipang onüktem aser Unity Gate aser Patkai Bridge temeket nung heavy vehicles anena ayuba nokdangtsü indang densema jembia liasü.

Board ajanga taxi aser ticket counters tem Inter-State Bus

Terminal (ISBT)-i belentsü atema jembia aser iba inyakyim asadangtsü atema committee ka kumteta liasü.

Manual rickshaws aser Thela-walas atema tenokdangba aser temelen lenmang agütsütsü indanga jembia aser iba maparen shisadangtsü Dimapur Municipal Council (DMC) aser Officer in Charge (Traffic) nem nungloktsü.

Board nungsa Dimapur Railway Station nung parking fees meshiba indanga jembia liasü, kechiaser tangya taxi tem dang DMC aser railway ketdangtsü temi sen meshir. Iba ken o bentettsü atema DMC-i railway ketdangtsü den jembishinütsü teletetba agi.

RTA board ajangasa lenmang balala atema speed limits tem lepa reprangshi aser

mapa kuma inyaksü atema state sorkar dangi zülutsü lemtet. Ano Chümoukedima aser Niuland atema RTA Board temeja amenoktsü indanga jembia aser state sorkar nem proposal agütsütsü lemteta liasü.

Kasa senden nung ano Dimapur, Chümoukedima aser Niuland atema two-wheeler taxi permits agütsütsü indang onük kanga süoki ia jembia aser permits aser form agütsütsü aser iba dak sendakba inyakyim indang lemteta liasü. Ano Dimapur Airport nung prepaid taxi booth ka amenoktsü indanga iba senden nung süoka jembia.

Maneni iba senden nung auto-rickshaw fares indang sub-committee report aser Dimapur, Chümoukedima aser Niuland nung RTA jurisdictions kübok gari anenba indanga jembia liasü.

Labour Department-i training ayonger

Dimapur, Tsüklai/February 21 (TYO): Labour Department ajanga sangdong ka nung, 2025 atema cutting & tailoring, knitting aser embroidery indang training course April 2025 nungi Labour Welfare Centres (LWC); (i) LWC Dimapur (ii) LWC Tuli, Mokokchung (iii) LWC Wazeho Mini Cement Plant, Phek aser (iv) LWC Doyang Hydro Electric Project (DHEP) Doyang nung tenzüksü, ta metetdaksü.

Ita ti training course atema application form ya office mapang pei Labour Welfare Centre nungi agütsütsü.

Application form ya March 15, 2025 tashinung agütsütsü, aser menden ya tatakzük dang alinung mezüng agütsür nem mezüng maongka agütsütsü, ta sangdong ajanga ashi.

Department-i training materials, kits ajak angati training tepiyong agütsütsü, ta Labour Department sangdong ajangasa metetdaksü.

FAC nung Alima Ajunga Tetsü Oshi Anogomung sentong kaogo



Fazl Ali College nung Alima Ajunga Tetsü Oshi Anogomung sentong nung adener Ao Department Kaketshirtem tangokba noksa.

Mokokchung, Tsüklai / February 21(TYO): Tanu Fazl Ali College nung Ao Department-i ayongzüka 25 buba "Alima Ajunga Tetsü Oshi Anogomung" sentong "Kong Ojang Den Sobaliba Ajuruteper" ta asüba omen nung ajemdaker kanga dang takok ngua agiogo.

Tanu iba sentong nung Ao Riju nung Publication Head Wb.I.Temjen Tzüdir ajanga anogomung nüngtem o den ano Kong Ojang Den Sobaliba Ajuruteper ta asüba omen nung ajemdaker jembia aser Fazl Ali College Vice-Principal ajanga Temeyoktep nung tobur ajung ta asüba onük nung ajemdaker jembia.

Kr.Asapokla, Asst.Prof.Dept of Ao-i sarasadema sentong tenzüker aser Department of Ao nung HOD Wt.Toshisangla-i

tarur pela agizükba o jembia ,4th Semester kaketshirtemi temeja ken ka aten,6th Semester Kongrotemi Tsüksen ken ka aten, 6th Semester Sangbangtemi Yimlusu ken ka aten sentong tatem nung telok ajaki Kibubai Sayuba Sarasadem agia tembangba den Sb.Akumsashi leniba nung sentong agia liasü.

Tanu iba sentong nung 2nd Semester,4th Semester aser Semester 6th pur atema "Aor Tar Nungur Otsü Ashiba Toktep" aser iba tetoktepba nung mezüngbuba jenjang Kr.Imsüyangla 6th Semester,tanabuba jenjang Kr.Repaienla 4th Semester aser tasembuba jenjang Kr.Kikayangla 2nd Semester par aseme ajangzüktet aser par asem senpet agizüka liasü.

Dental Surgeons atema State Level training ayongzüker



Dimapur, Tsüklai/February 21 (TYO): State nung National Health Mission (NHM), National Oral health Programme(NOHP), National Urban Health Mission (NUHM), Rashtriya Bal Swasthya Karyakram (RBSK), Non-Communicable Diseases (NCD), National Tuberculosis Elimination Programme (NTEP) aser Quality Assurance ama sentong balala kübok inyakba Dental Surgeons atema State Level Training anogo ka asoshi Conference Hall, DH&FW Kohima nung February 21, 2025 nü ayongzüka liasü.

Training ya National Oral Health Programme, Nagaland ajanga ayongzüker, kong Dr.Reyosalu Lase, Dy. Director & SNO (NOHP) menden liasü aser paisa training nung adener tem pela agizükba o jembia aser iba training ayongzüker indang nükjidong rateta ashi.

Iba training nung sentong

akhumdong ka ama Dr.Meriben Odyuo, Director (Dental) DH&FW aden aser lai National Health Mission (NHM) kübok National Oral Health Programme (NOHP) koda tongtipang ta asüba indang jembia.

NOHP ajanga India nung oral health tajungba kumdaktsüba nung tongti shilem agiba indanga lai rateta ashi aser NCDs, NTEP, RBSK aser Quality Assurance amala National Health programme danga den lungjemer inyakba indang ashi.

Laisa training nung shilem agritem dang National Health nükjidong den putepa oral health care tajung agütsütsü aser pei wadang nung shisa lemsateptsü ayongzüka liasü.

Training nung shisalen sayur ya Dr.Alemwabang Aier, Jt. Director & SPO, NCD; Dr.Vezokholu Theyo, Jt. Director & SNO, NTEP; Dr.Khelito Zhimomi, Jt. Director & SNO, RBSK;

Dr.Arenla Walling, Jt. Director & SNO, (NTCP); Dr. Sentirenla. Jr. Dental Specialist, DH Dimapur aser Dr.Neingutuonuo Angami, Jr. Dental Specialist, NHAK nungertem liasü.

Iba training tembanga Dr.Neiphrez Sorunuo, Jr. Dental Surgeon, NHAK ajanga melepzüng o jembia liasü.

[6:28 pm, 21/02/2025] Jungshi Tyy: DIPR ajanga metetdaksür

Dimapur, Tsüklai/February 19 (TYO): Directorate of Information & Public Relations ajanga, March 3, 2025 nungi tenzüksü aliba 14th Nagaland Legislative Assembly indang Sixth Session agiba osang abentsüpur ajungai pei tenüng, designation, organisation aser Car No. (Car pass atema) iprnagaland@gmail.com nung taoba mapang sangdonga aliba ama February 27, 2025 masü February 24, 2025 tashinung agütsütsü sangdong ka nung metetdaksüogo.

Longleng nung PM Vishwakarma awareness sentong agiogo

Dimapur, Tsüklai/February 21 (TYO): February 19 nü Deputy Commissioner Office, Longleng nung PM Vishwakarma Awareness cum Onboarding Session ka agiogo.

Iba sentong nung yimtsüng aser Urban Local Bodies (ULBs) balala nungi nisung 1000 shi-i shilem agia liasü.

Sentong tenzüka Deputy Commissioner, Longleng, W.

Manpai Phom-i PM Vishwakarma indang metetdaksü, shibai traditional artisans aser craftsmen tem ajungkettsü atema PM Vishwakarma Yojana koda tongtibang iba indang lemsatepa liasü.

Iba scheme indang General Manager, District Industries Centre (DIC)-i tongmelang agi rasa ashi aser iba sülen Project Consultant, PMU KM. Lohe Lokajia Victoria-i scheme indang tatongi metetdakja liasü.

Iba sentong ajanga PM Vishwakarma scheme nükjidong, tajangzüker aser benoka inyakba indang tangatetba kanga junga agütsüogo aser iba ajanga artisan aser small-scale entrepreneurs tem provisions balala agitsü asoshi ajungmesogo. Sentong nung shilem agirtemi kanga jangrabangra shilem agiba ajanga iba inyakyim kanga junga agizükba kuli agütsüogo.

PM Vishwakarma scheme ya India sorkari amenok aser iba ajanga artisans tem nem senotsü teyari, parnok sempet arangtetshitsü atema teyari agütsüba den shishilembatsü asoshi tesendaktep yanglutsütsü meranger. Longleng nung iba awareness sentong ayongzüka agiba ajanga tangazükba agütsüba den local craftsmen aser artisans tem züngoksemtsü aser parnok ajungkettsü atema maongka tajung agütsüogo.

BJP-i Delhi election mapang nangzükba ama meinyak: Atishi



February 21, 2025 nü New Delhi nung osangbenertem senden ka nung taoba mapang Delhi chief minister aser Aam Aadmi Party (AAP) lenir, Atishi den tangartem tangokba noksa nung angur. Atishi-i, BJP-i Delhi nung sorkar akümba sülen mezüngbuba cabinet senden nung tetsürtem nem ita shia sen 2,500 teyari agütsütsü atema scheme agizüksü ta nangzük, saka parnoki nangzükba ama meinyak, ta aitsü.

New Delhi, Tsüklai/February 21 (Agencies): Aam Aadmi Party (AAP) lenir aser taoba mapang Delhi Chief Minister Atishi-i, Delhi nung chief minister tasen, Rekha Gupta-i aniba cabinet-i mezüngbuba senden nung Delhi nung tetsür shia nem ita shia sen 2,500 teyari agütsütsü atema scheme magizük, ta metetdaksü.

Brihostibarnü tang mezüng BJP MLA, Rekha Gupta-i Delhi chief minister tenangzükba agi. Iba sülen lai, lar party-i nangzükba ajak sorkar tasenbai ataloktsütsü, ta metetdakja liasü. Osangbenertem senden

nung jembidang Atishi-i Rekha Gupta nem tenüngsang agütsü, ajisüaka election mapang nung nangzükba ama BJP sorkari meinyaker, ta aitsü.

Atishi-i, "Modi-i mezüngbuba cabinet senden nungsa Delhi nung tetsür shia nem ita shia sen 2,500 agütsütsü atema scheme agizüksü ta nangzükba liasü. Yashi mezüngbuba cabinet senden menogo saka ? 2500 scheme magizük," ta metetdaksü.

"Chief Minister mezüng akümba anogo nungsa @gupta_rekha-i linük nung nüburtem dang Modi tenangzükbatemji taila, ta

sayuogo. Tang tasüngdangbaji ya- March 8 anogo tashi nungbo tetsür shia account nung sen 2500 inoktsütsü asü, mesüra iba ya-a Modi yimyim taila ka dang?" ta Atishi-i asüngdang.

Ato kilonserisa, March 8 tashi nungbo 'message' angutsü asoshi linük yimtiba nung tetsür shia bank account ji pei mobile number den sendakteptsüla ta shiogo, ta Atishi-i ashi.

Brihostibarnü Atishi-i, "Sorkar tasenba tanü tenangzükba agiogo aser mezüngbuba cabinet sendenji nikongdang amentsü. Ni BJP sorkar dang iba scheme agizüksü atema takhangba agütsür," ta metetdakja liasü.

"March 8 tashi nungbosa nangzükba aliba ama mezüngbuba instalment agutsütsü asoshi telemtetba agitsü atema Delhi nung tetsürtemi atadar. Tanü cabinet senden nung BJP aser Gupta-i nangzükba aliba ataloktsütsü imlar," ta lai metetdakja liasü.

Atishi o langzükba Chief Minitser Rekha Gupta-i, "Iba ya ozü sorkar aser teinyaktsü onüktemji onok meyang. Onok mapa inyakdakjang; lar sorkar aliba mapang nung lai lai teinyaktsü inyakogo," ta ashi.

Delhi nung Mohalla clinics scheme bushisüngdangtsü: Pankaj Singh

New Delhi, February 21 (Agencies): Tang Delhi nung Health Minister tasenba, Pankaj Kumar Singh-i, Mohalla clinic tenüng nung nüburtem ashioksüogo, anungji BJP sorkari AAP sorkar yimsüsüba mapang aibelenba ajak bushisüngdangtsü, ta metetdaksü.

Singh-i, "Mohalla clinic tenüng nung nüburtem ashioksüba indang senden nung onoki jembio. Item Mohalla clinics ji Delhi sorkar li nung lir, anungji onoki itemji tajungba kümdaktsütsü aser Ayurvedic facilities inoksemtü. Taoba sorkari aibelenba ajak onoki bushisüngdangtsü," ta metetdaksü.

Hokolbarnü ketdangsertemi, sorkar tasenbai healthcare asalentong yanglushitsü, digital health services integration inoksemtü, Mohalla clinics nungja 'Aarogya Mandirs' ta melentsü, mapa tazüng atema nübo shimoktsü aser tang tesüdak hospital tem tekeraba nung renemtsü, ta metetdaksü.

Mohalla Clinics agi 'Aarorya Mandirs' ta melenba sülen facilities tali agütsütsü.

Tang sorkar hospital aika nung medical superintendents (MS) aser medical directors (MD) peria mali, ibaji ajanga ketdangser kati dang khenyongi hospital aika reprangtsüsa

akümer, ta ketdangser kati metetdaksü.

Ketdangsertemi Health Information Management System (HIMS) reprangshitsü aser Clinical Establishments Act-a reprangshitsü.

"Tesüba küm ka tashi onoki health sector nung metokmeperi aliba metetdakja arudar. Department ajak dang mezüngbuba anogo 100 atema asalentong metetdakjang ta tuyuogo. Iba dak alia tongtibang mapatong kar benoktsü," ta ketdangseri metetdaksü.

HIMS ya 2008 küm October ita nung Ministry of Health & Family Welfare-i ketdangsäa benokba web-based Monitoring Information System ka lir. Iba ya sorkar sabang nungi ochimashi mita reprangtsü aser nokdangtsü atema lir.

Ano külen Clinical Establishments Act of 2010 ya Centre sorkari benokba ozüng ka lir. Iba ozüng kübok linük tesem ajaklen clinical facilities-i register asütsüla aser facilities den services junga agütsütsüla.

Delhi Cabinet mezüngbuba senden nung Delhi nung Ayushman Bharat health insurance programme mapa küma inyaktsü telemtetba agiogo.

2015 küm October ita nung Delhi nung AAP sorkari Mohalla Clinics tenzüka liasü.

Sergey den Ukraine rara indang jemb: Jaishankar

New Delhi, February 21 (Agencies): Johannesburg nung G20 foreign minister tem senden aliba mapang nung External affairs minister (EAM), S Jaishankar-i Russia foreign minister, Sergey Lavrov ajurua jurila senden ka menogo.

Iba senden nungji Jaishankar aser Sergey nati India aser Russia na tsüngda amalitepa inyakba jenjang reprangshi aser tawa Sergey-i Riyadh semdangba densema Ukraine nung raraba dak sendakba onüktem nung o lemtepogo.

Tesülen Jaishankar-i X ajanga, "Nikongdang Johannesburg nung Russia Finance Minister Sergey Lavrov den senden menogo. India-Russia amalitepa inyakba jenjang asadangogo. Pai Riyadh semdangba densema Ukraine nung raraba onüktem nung o lemtepogo. Maneni tongtepratepa alitsü bangjemogo," ta metetdaksü.

Jaishankar aser Lavrov natisa maneni linük ana tsüngda tesendaktep tashi itshitsü atema inyaktsü bangjem. India aser Russia na tsüngda rongsenkettzüng,

defence aser energy sectors nung tesendaktep junga lir.

Jaishankar-isa South Africa Tir Cyril Ramaphosa-a ajuru. Pai Ato kilonser Narendra Modi-i salem osang abenba pa den lemsatop aser India-i South Africa lenisüba nung G20 tongti onüktem atema inyaktsü, ta nangzükba liasü.

Jaishankar-isa Singapore foreign minister Vivian Balakrishnan, Brazil foreign minister Mauro Vieira aser Ethiopia foreign minister Gedion Timotheos nunger den-a jurila senden amen.



February 21, 2025 nü New Delhi nung Delhi Chief Minister Rekha Gupta-i Rashtrapati Bhavan-i oa linük Tir, Droupadi Murmu ajurudang tangokba noksa nung angur.

Punjab election nung Congress-i tasenpur 60-70 toktepdaktsütsü

New Delhi, February 21 (Agencies): Taruba Punjab Assembly election nung Congress party-i tang tasenpur 60-70 shi toktepdaktsütsü, ta Punjab Congress Tir, Amrinder Singh Raja Warring-i metetdaksü.

Punjab Youth Congress state executive senden nung jembidang Warring-i, party-i lenirtem asentenshitsü aser Punjab nüburtem taginüba ataloktsütsü atema rangloker inyaker, ta ashi.

"Nüburtem lenitsü atema state nüngdak angatertem shimtsü asoshi Punjab Congress-i inyaktsü," ta Warring-i metetdaksü.

Paia, "Item tejak tasenpurtem ajanga temelenshi bener arutsüba dang masü saka lanurtem aser sensakertemia tamang katettsü," ta ashi.

Youth

Congress

züngsemtam ajungshia pai, "Iba ya Punjab nungertem dang asenoki chichiba temelenshi bener arutsütsü ta kuli sayutsü atema maongka tajung lir," ta ashi.

Kasa sentong nung Indian Youth Congress (IYC) Tir, Uday Bhanu Chib-ia lanurtem dang 2027 küm assembly election nung Aam Aadmi Party (AAP) sorkar menden nungi atsüngdoktsü atema meranga inyakang, ta ayongzük.

Chib-i, Youth Congress ya party tongtoret lir, ta shia lanurtemi yimtenren tongbang tejaklen nokdakba atema tenüngsang agütsü.

Chib-isa, 2024 Lok Sabha elections nung Congress-i Punjab nung menden tenet nung takok anguba ajanga state nung party tashi itshiogo aser nüburtemi Congress sorkar arudaktsütsü atema renema lir, ta metetdaksü.



February 21, 2025 nü New Delhi nung Ato kilonser Narendra Modi-i tang mezüngbuba SOUL Leadership sentong tenzüksüdang tangokba noksa nung angur. Kasa noksa nung Bhutan Ato kilonser Tshering Tobgay-a angur.



TIR YIMYIM YIMOBILEM (EDITORIAL)

DIMAPUR KÜPTOKNÜ, FEBRUARY (TSÜKLAI) 22, 2025

India tasen tilabaka yanglur asü?

India ya Bharat aser tangbo India- a masü aser Bharat-a masü saka Hindusthan kümer Hindu lima akümtsü asoshi merangba purtem aika lir. Item jagi India ya English oshi nun g ajaba lir, anungji India ta asüba tenüng ya dena melentsü bilemer. Ajisüaka, tanü aliba India ya makümdang aser alima nung English nung maindang, akhi putu 330 BC shi nung Esther kaket züludanga India ta tenüngteta zülusemtsüsa atalokbaji, English nungertemi jembiba oshi nungi aruba masü saka Greek aser Sanskrit oshi nungi aruba alitsü südi ta tashitemeteteremi bilemer. Atangji, India nung Hindu yimsü dak amanger nütsüng teimba, anungji teimbai mulungbalen ka India agi Hindusthan ta melenyonga kecha masü saka Hindusthan nungji Hindu yimsü dang amangtsüla aser Hindu nung sobaliba dang beshitsüla ta bilemra, iba tebilemba aser tangatetba jagibo India tasen ka, tang dang nungi tilaba ka, yanglutsü apusor asütsü. Joko taoba küm ishika India tesem aika nung, talisa, Khristan-tem sadema tekülem sentep magitetba aser sayutsüngi mesütetba timtem lendong ajuruba angur aser angashir. Aji oda, Hindu nung Khristan kümdaktsübabu ozüng anema inyaker asütsü saka Khristan pur kar Hindu yimsü dangi meyipra ajjibo pei kidangi shilangba mapa ka dang asütsü. Iba ama tensa mapang ka nung, ano tang Chhattisgarh state nungbo aruya aliba ita March ka nü nungibo Khristan purtem alidak yimtsüngtem nung Khristan purtem anema inyaksü asoshi nisung ka tenüng agi Aadesh Soni-i par tamangba yimsü lokti senden ka nung tayongzükba agütsüba o ji, Khristan purtem asoshi dang masü saka India asoshia timtem takoksa ajurutsüba o ka lir. India ta tenüng jatetbaji tang taküm alir yimsüsürtemia junga meshitettsü saka tanü India ta tetshitsüsa kin ka longjemtetba ya Hindu nung kija mapa aser tenla agi masü saka Khristan aser Muslim nungertema India akümba nung shilem tulu agia lir. Iba jagiang, India temzüng yanglurtemia India ya Hindu nung kija lima masü saka Muslim, Khristan aser tamangba yimsü ajak sademsadema sayudak aser amangdak lima ka asütsü ta linük temzüng okila aser onangnen nung kanga jangjajangjaa shia lir. Iba tangatetba aser nükjiong nung jagi pilar, India nung ya Hindu yimsü dang amangtsü ta lemtet nungbo, iba anogoji akhidang India aser Pakistan na lemdang ama, tang aliba India agi alima asem pezüka kümadoktsü. Koba tamangba yimsü südirsüaka, tamangba yimsü yabo nisungi nisung anema inyaksü tentetba masü saka nisungi nisung meimtsü aser nisungi nisung asoshi tajung inyaksü tentetba yimsütem lir, anungji tamangba yimsütem rongnung nisungtem asoshi tajung inyaksü tokteptsüba dak alaka tamangba yimsü kati ka anema inyaksübaji tebilema mebilemtsüla. Atangji, alima nung tamangba yimsü shia achiajem, benjongbentsü, külemküja aser sübosülemtsü dena balala lir, anungji itemji pei pei tamangba yimsü nung pei sobaliba akümer. Aji oda, achiajem nunga Muslim nungertemi akshi machir, Hindu nungertemi nashi shi machir, Khristan-temibo ajak achir saka ano Jain yimsü amangertemibo shi ango kecha machir ta pei pei tesayuba aser tamangba yimsü agi sobaliba akümba mapatem aika lir. Itemji kodang bilemdangdir, Tsüngrem nisungtemi alima nung nisungtem taküm merükteta alitsü asoshi sayuba sobalibatam lir ta angatetsü. Ajisüaka, India ama tamangba yimsü ajak aremoka alidak, tashiyim agi tamangba yimsü kati melaba sobaliba dang beshitsü merang nungbo, tamangba yimsü agi yimjung yanglutsü melen rara menar asütsü aser chiyongtsü agi pelateptsü melen chiyongtsü agi tsükchi ayimer asütsü. Atangji, tamangba yimsü tapu balala amanger alidak kati ka tamangba yimsü aser sobaliba akümtsübutsubaji kanga tongtibang lir. Aji oda, Hindu nung telong junga alidak Khristan purtemi parnok akümtsübutsuba nashi shi machi aremra mesüra Muslim nung longsua alidak ak shi machi aremra, iba jagi Khristan taküm nung jakla tajung ka sayur asütsü, Kasaji, Hindu aser Muslim nungertemi kati ka tamangba yimsü aser sobaliba akümtsübutsuba beshira, ano ajiang tamangba yimsü tajung ka amanger amai asütsü. Iba ama tangatetba aser tashi jagiang India telongjem tashi aittsü.

OLEMSABANG

AROGOTEM NUNG TSÜNGREM O TESAYUBA TSÜTSÜ (CHRISTIAN EDUCATION) BILEMDANGSHITSÜ ONUK KAR

~ I.Asongla Pongen, Alempang Ward, Mokokchung.


(Yashi adok nungi...)

1. Mezüngbuba aser kanga tongtipangtibaji, tamanger aikadi, Christian Education inyakyim/mapa ya tai angatet amai bilemer. Christian Education ta asüba ya tila tanür atema dang, deobar nu Sunday School nung ghonda ka nung kechi sayur, angazükdaktsür, iba dangji ajar ta bilemer. Text book adoka küm ka atema lesson course renema aliba sayur iba nung jagi küm tema arudang tatidang agia pass sudaktsüba kija dangji Christian Education ta angatetbaji tai. Iba ama angatetba ajanga asen lima nung Children Ministry atema ayuba full time minister dang Christian Education Director or Promoter, etc, ta tenung agütsür ayur.
2. Sunday Schoolji tila tanür tem atema dang mesura tasoba küm tataktet (age limitation) ka atema dang ta angatetba ajanga class telemsa tatempangba nung graduation sentep agia certificate agütsür Sunday Schooli aobaji atemer, saka nisung ka taküm asoshi Laishiba tesayubaji pa/la soli nungi masü tashi maneni angazükdakja aser beshia alitsü, pei taküm azüoka liyonga aotsü shisatsü agütsübaji Christian Education teinyaktsü.
3. Arogotemi kanga aroka shisadangtsü kaji, Sunday School nungi graduation agia yokertemji ano shirnoki parnokji anepalua sayutsü? kong Tsüngrem O angazüktsü? kongi aor?, iltem tepenjem takümttem asoshi follow up kechi agütsür? Tsüngremi O agi metetemi mesua tekümtet leman nung jajadaktsütsüji Arogo nung Christain Education mapa/teinyaktsü.
4. Tang Arogotem nung lokti sentep asemben agir, iba dak tali tetsür sentep, lanur sentep, tila tanürtem sentep, ta agiteper. Devotional sentep nung Bible study magütsüteter, kechiyong iba ya temeyoktep telok sentep, ano deobar sentep nung mapang shia tongtipang anogotem (special days/observations) agitetta amonger. Anungji, Christian Education agütsütsüba mapangji Wednesday aser Saturday sentep nung mesura ano mapang balaka agitetta Lai tesayuba agütsütsüji Christian Education teinyaktsü. Kechiyong Yisu Khrista dak amanger ka ama, kodangsa khuret balala agi kija, kibong, loktiliba aser Arogo anokshidir, tapet tesayuba, telangzüba aser shisatsü angudakji Laishiba ji lir, anungji iba tangazükba yabo tila tanür atema dang masü, küm eshika Sunday School nung ozüng sua angazükba kija jagi Christian Education teinyaktsü mapensadaktsür.
5. Lokti tekülem mapang Tsüngrem O junga ratetta ashiba aser iba tesayuba küpok kati ka den koma yaritepa, angazüktepba, beshitepa alitsü tangatetba agütsüba ajanga dang nisung ka tamang (faith) nung aiener, iba ama tangatetba nung liyonga aodang mapa tajung inyaksü, taküm ka merukteta asüngteta alitsü metetdaktsür aser tejakleni awa oa mapa tuluba/tajungba inyaksü tasü itshidaktsür. Ano, nisung taküm ka nung lendong aser tesama balala ajurudang, Khrista dak amanger ka ama itemji koktetta aser agizüktetta alitsü aser teyimla tasen angutsü asoshi, Laishibaji maneni bushitsüla aser angatetdaktsütsüla, item shisatsü anganua agütsübaji Christian Education mapa.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran linük nung Khristan ana jail nung tanaben puokogo



February 21, 2025: Iran nung 2022 küm aser 2023 küm na nung Khristan ana jail nungi chioka liasü, ajisüaka tawa (February 6) tenaprongla tanaben pua jail nung puokogo, ta Khristan melungtet telok Article 18-i metetdaksü. Tehran province nung Intelligence agent temi Nasser Navard Gol-Tapeh aser Joseph Shahbazian na kidang lia apu aser Tehran nung aliba Evin jail nung puokogo. Arrshi küm 63, Gol-Tapeh ya Islam yimsü toktsür Khristan

yimsü agizüker ka lir. House church nung shilem agiba ajanga pai linük security anema inyak, ta pa aija küm 10 tepuokdak ayutsü obendang agüja liasü. Ajisüaka tepuokdak küm 5 dang abensarbo 2022 küm October ita nung pa dang tai toka jail nungi chioka liasü. Article 18-i, "Tim masüba nung tanaben apuba atema tejashi nung Nasser-i chiyungtsü memelunger. Kasa mapang nungji Tehran nung Khristanem aika apu aser jail nung puoka lir," ta metetdaksü.

Ano arrshi küm 60, Shahbazian ya Iranian-Armenian nunger lir. Pai linük security anema inyak ta aija Evin jail nung küm ka puokba sülen pa dang tai toka 2023 küm September ita nung chioka liasü. Iran nung Armenian Arogotem melar. Pa tanaben apuba ajanga Iran nung Khristanem kümzüka maliba kuli sayur, ta Article 18-i metetdaksü. Iran nung Khristantemi Islamic Republic tetuyuba ama meinyakra ketdangsertemi apur

aser linük security anema inyak, ta tai tonglochtsür. 2022 küm Nasser chiokba sülen Article 18 nung Director, Mansour Borji-i, "Kuli kecha makai Nasser apu, tiyazü nung tai tonglochtsü, tim masüba nung küm pongu tashi tepuokdak ayu, ken o tanaben angadangtsü memela aser medical teyari magütsü," ta metetdakja liasü. Shahbazian-i par kidang house church ayongzükbä atema tamasabo pa küm 10 tepuokdak ayutsü obendang agüja liasü. Article 18-i, "Armenian aser Assyria nungi Iran nungertem pei oshi nung tekülem agütsü atema temelaba agütsür, ajisüaka tesüiba küm 15 tashi Persia oshi nung tekülem agiba Arogotem aika shibangja arur. Ibayongji Persia oshi nung tekülem aginertem atema tekülem ki mali," ta metetdaksü. Tenla kitem shibangtsüba ajanga aikati pei kidang tekülem agir, ajisüaka ibaji linük security anema lir, ta aitsür. Alima nung Khristanem alitsü atema linük tamajungtiba 50 rongnung Iran ya jenjang 9buba nung lir (Open Doors' 2025 World Watch List (WWL).

Congo nung kiralongrartemi Khristan 70 tekolak tangzük

February 21, 2025: Democratic Republic of Congo (DRC) kübok North Kivu Province nung aliba Protestant Arogo ka nung Khristan 70 tekolak tangzüka lepseter lia angu, ta osang ka ajanga metetdaksü. Khristantemji Allied Democratic Forces (ADF) kiralongrartemi puer oa liasü. Taoba Brihostibarnü anepdang 4:00 ako meta kiralongrartemji Lubero kübok Mayba yimdaki arua liasü, iba sülen parnoki yimdaklirtem dang kidang nungi ayazüka alung ta tuyu. Iba mapang nungji pei ki toktsür aoer Khristan 20 shi apu, ta Open Doors-i metetdaksü. Yimdaklirtem jagi parnok kümzüksü merang, ajisüaja kiralongrartem jagi ano Khristan 50 apu. Iba sülen Khristan 70 pronglaji Kasanga nung aliba Protestant Arogo Tenla ki kati anir aoba sülen yangji tekolak tangzüka lepset, ta Open Doors-i metetdaksü. Khristan melungtet telok International Christian Concern (ICC)-i, ADF kiralongrartem jagi anogo ishika Khristantemji pua ayuba sülen tepset, ta metetdaksü. ICC Tir, Jeff King-i, "Tawa Khristan 70 tepsetba ya tang tasen masü. Tesüiba küm 20 tsüngda DRC nung raraba mapang nisung million 6 dak tali süogo. DRC nung nütsüng tiembaka Khristantem lir, anungji iba ya Islamic kiralongrartemi (ADF) yimsü

nung ajemdaker nisung jenti tepsettsü nükjidong nung inyakba lir," ta metetdaksü. Jeff King-isa, "Joko sarasademba den külemi asenoki Africa sepaitem dang longjemer inyaktsü atema akhangtsü mapang tongogo. Nisung jenti tepsetba aser azü tokshiba anentsü atema asenoki takhangba agütsütsüla," ta ashi. School ka nung director-i, region nung rara ajanga Arogotem aser health centers aika shibangogo aser inyaksangshi ajak anena lir, ta metetdaksü. CECA20 Arogo nung züngsem kati, "Khristan aikati pei taküm kümzüksü atema Lubero toktsür jenogo. Joko onoki kechi inyaktsüar memetet, mesüra koma sarasademtsüar memetet, kechiyong rara agi onok laktetogo. Oda Tsüngrem melung dang süang," ta ashi. ADF ya Islamic State kiralongrar telok den sendaktepa lir. Tesüiba küm aika ADF-i northeastern Congo nung timtem agüja arur. 2014 küm ADF-i North Kivu province kübok Beni territory mezüng amak, iba sülen Ituri province kübok Irumu aser Mambasa nunga parnoki mapang shia timtem agüja arudar. Alima nung yimsü nung ajemdaker nisung teimtiba tepsetba linüktem rongnung DRC ya jenjang 35buba nung lir.

DRC nung kiralongrartemi amakba sülen auyar; iba region nung Tenla ki aika shibangogo aser Khristan yimtsüng kar nungbo joko shinga mali. Iba ama tensa ka nung Rwanda-i pusemba M23 telungpurtemia timtem agütsür. Open Doors nungi John Samuel-i, item ama tatalokba jenti liaka aibelenertem nem temerenshi magütsür, ta metetdaksü. Samuel-isa alima tesem ajaklen Khristantem dang DRC nung Khristantem atema sarasademjang aser rara anentsü atema tiyongtsüi ia inyakang, ta ayongzükb. U.S. State Department-i, "Islamic State of Iraq and Syria-Democratic Republic of Congo (ISIS-DRC) dang Allied Democratic Forces (ADF) ta ajar, aser iba telok ya U.S-i kiralongrar organization ka, ta sangdongogo. ADF-i North Kivu aser Ituri Province na nung maneni timtem agütsür aser Arogotem aser Arogo lenirtem anema inyaker. Parnoki ajak anema inyaker, ajisüaka takoksa angurtemji teimbaka Khristantem lir," ta metetdaksü. DRC nung nütsüng million 7 bo tesem balala nung jenshia lir. Khristan charity telok World Vision-ia Congo nung tanur refugees yaritsü atema ayongzükbogo. 1998 küm nungi tenzüka Congo nung rara ajanga nisung million 6 dak tali süogo.

ANOGO ABEN TSÜNGREM DEN

KOTAK TSÜTSÜ REPRANGANG ASER KIBUBA DAK IMLAANG

"Kibuba dak amangang, tashi itang aser ne mulung tasü itang; aser kibuba dak ne teimla yuang" ~ **T. Ken 27:14**

Dawid chubai tensa tia ajak nung kotak tsütsü repranger Kibuba dak teimla yur Kibuba pa dangi arutsü anogoshia penzüa ali.

Kotak tsütsü repranger Kibuba dak tamang yuang ta ashiba tetezü Tsüngrem dak repanger mapang ajak nung Pa dak tamang yuang ta ashirba lir. Asen kümtetdakba Yisu Khristai pa tasü nungi shia arur tanaben Kotaki ayipba atudang nangzükbä ama kenü Kibubar anogo nung Pa tanaben meyipa iba limai arutsü aser Pa dak amanger shia pai anir Kotaki ayipba atutsü.

Kibuba Khrista ano maru tashi iba lima nung amangbapurtemi timtem tekangshi jenti ajurutsü saka item tia ajak nung shirnoki Kotak tsütsü repranger Kibuba dak tamang yudir parnoki item tia ajak ajangtangtsü Tsüngrem nungi tashi angutsü aser Kibubar anogo nung parnoki Kotak yimli alangzüker ka ka akümstsü. Tia ajak nung Tsüngrem dak rangloker asen teimla ajak Pa dak metaloker jajaba amangbapur ka ka asütsü merangdi.

AO OSHI ANGAZÜKDAK:**TANÜ ANGAZÜKTSÜBA OJANG****Tejokjok**

(v) tesüngjem makaba jakla, yakta ain adokba (restless, short temper)

* Tejokjok nisung lokti lenir makümtsü.

Tejong

(n) süngo mesüra naro aika küma alenba (bunch)

* Naro tejong ka sen noklang ana agi ali.



Tir Yimyim

OLONG PAITEP # 7071

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasatsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7070 TELANGZÜBA**TIPIEN :**

2. Pongsen, 5. Lepko,
7. Omen, 8. Maongka,
10. Yangkhu, 12. Senpong,
14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA

Bournemouth, England nungi David A Lindon-i 'smallest handmade sculpture' indang Guinness World Record ka yangluogo. Pai 0.02517mm by 0.02184mm asadangtetba Lego piece ka nung sculpture ka yangluteta liasü. Lindon ya engineer ka lir aser pai 2019 nungi micro artist ka ama inyaksü tenzük aser tang pai yangluba sculpture ji "human white blood cell" tasazük den kasa lir.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Küm 90 sülen Assam Assembly nung 'namaz break' agiener

Guwahati, February 21, 2025

(Agencies): Assam Assembly nung küm aika Hokolbarnü Muslim nunger MLA temi namaz asütsü atema ghonda 2 sodi agüja aru saka tang budget session nung mezüng atema iba sodi agienogo.

Taoba assembly session nung namaz break agientsü lemtet agia liasü saka tan session nungi ang iba ya mapa küma tenzük.

Iba lemtet ya MLA tem nübo nung ajemdaker agiba liasü ta AIUDF MLA Rafiqul Islam-i mepelaba metetdaksüogo.

"Assam assembly nung Muslim MLA 30 shi ka lir aser onoki iba tebilemba magizükba metetdaksüogo, saka parnok (BJP MLAs) nübo teimba lir aser iba nung ajemdaker parnoki mapa tenzük" ta Islam-i ashi.

Muslim MLA temi anameta nung namaz asütsü atema inyakyim ka latettsü akok ta Leader of Opposition aser Congress MLA Debabrata Saikia-i ashi.

"Tanü ozü party züngsemtem aser AIUDF MLA temi olemtep tongtipang nung medentet kechiyong parnok

namaz asütsü atema ao. Iba ya Hokolbarnü dang agiba sarasadem asünung anameta inyaktettsüa inyakyim ka alitsüla" ta Saikia-i ashi.

Yaküm August ita Assam Assembly Speaker-i aniba Rules Committee-i küm 90 benshia aruba inyakyim anentsü lemtet agia liasü.

Constitution ya secular tangatetba nung lir anungji Assam Legislative Assembly-i tanga anogotem ama Hokolbarnüa session agia aotsüla ta Speaker Biswajit Daimary-i ashi aser iba tebilemba ya Rules Committee dangi benokba sülen agizüka lemtet ka aküm

Chief Minister Himanta Biswa Sarma-i iba lemtet pelashishia agizükogo. "1937 küm Muslim League lennir Syed Saadulla-i iba inyakyim tenzük liasü aser session tiptema agia aotsü atema iba lemtet agiba ajanga British nunger yimsüsüba mapang inyakyim ka agiener" ta CM Sarma-i ashi.

Mizoram nung Rs 5 lakh coverage agütsüba health scheme ka tenzüksü

Aizawl, February 21, 2025

(Agencies): Mizoram sorkari health insurance scheme tasen ka tenzüksü aser iba ajanga beneficiary nem Rs 5 lakh agütsütsü ta chief minister Lalduhoma-i Hokolbarnü metetdaksüogo.

Iba scheme ya taruba financial year nungi mapa tenzüksü akok ta pai ashi.

Mizoram budget session nung Governor onük atema olemtepdang Lalduhoma-i taoba Mizo National Front (MNF) sorkari healthcare scheme ka tenzüksü sentong inyakdanga aru ta ashi.

"Asian Development Bank (ADB) nungi Rs 1,000 crore loan teyari agia iba health scheme tenzüksü tebilemba liasü saka merangaka loan mangu aser iba jagi ozü sorkari tanga inyakyim ka atongtet" ta CM Lalduhoma-i ashi.

Pensioners, sorkar mapa inyaktertem, aser nija mozü kitem den iba scheme atema jembitepar, ta chief minister-isa ashi.

"ADB dang loan magii asen senpong nungi küm shia Rs 5 lakh coverage agüja healthcare scheme inyaktettsü" ta pai ashi.

Iba scheme ajanga cashless

treatment agütsütsü aser sorkari nija mozü kitem den kobi melii tenangzükba agitsü imlar, ta CM Lalduhoma-i metetdaksü.

State sorkari Mizoram State Health Care Scheme (MSHCS) mapa inyaker aser iba ya 2019 nung MNF sorkari tenzükba lir. Iba schema ajanga kümshia Rs 2 lakh coverage agütsür.

Iba dak alia Mizoram state nung Centre sorkar indang Ayushman Bharat Pradhan Mantri Jan Arogya Yojana (AB-PMJAY) mapa inyaker. Iba scheme kübok kümshia Rs 5 lakh health coverage agütsür.

Arunachal nung CBN-i poppy alu aika raksatsü

Guwahati, February 21, 2025

(Agencies): Security forces aser state sorkari teyari agüja Arunachal Pradesh nung Central Bureau of Narcotics (CBN)-i drugs shibelenertem aser kiralongraba sendaktepa inyaksangshiba putetogo.

Tesüiba ita ana tsüngda Lohit, Namsai, aser Changlang dena district kar nung bushisüngdanga aodang ali hectares 6,000 nung poppy lu

raksatsüogo.

Namsai District nung Assam Rifles-i CBN, CRPF, aser Arunachal police den külemi poppy lutem raksaja ao.

Iba district nung ali hectares 180 nung poppy alu bushitetogo aser hectare 22.5 nung Rs 30 crore shi alang poppy raksatsüogo. Iba tesem nung Rs 500 crore shi jungnüa indang poppy lu yima lir.

NSCN (K-YA) aser Ulfa (Independent) amala telungpur

teloktemi poppy lu raksatsüba mapa meinyaksü tetuyuba agütsüba ajanga iba mapa inyakba nung lendong keta liasü.

Telungpur teloktemi amokmerenba ajanga mapa inyaktertem ajema aküm saka Assam Rifles-i nungita poppy alutem raksatsüogo.

Tsüngsang majungba ajanga CBN-i tang tashi nung poppy alu 50% nungi 60% tashi dang raksatsüogo.

Gaza nungi tasü mang meyipa agütsüba ya Shiri Bibas masü: Israel



Shiri Bibas

Jerusalem, Tsüklai/February 21 (Agencies): Brehostibarnü Gaza nungi tasü mang meyipa agütsüba ya Shiri Bibas masü ta forensic tendangba nung jangjatetba sülen Hamas-i ceasefire tezüngzüktep nung aibelener, ta Israel-i tai tongloksü.

Iba tasü mang den külemi ano tasü mang asem agütsüba rongnung ana lar jabaso Ariel aser Kfir ta jangjaogo, shirnok arishi küm pongu aser ana aser nisung ka ya Oded Lifshitz, ta Israel Defense Forces (IDF) ajanga ashi.

Saka tasü mang pezü buba ya Shiri masü aser pua alirtem indanga masü, aser Hamas-i süngden nung Gaza tsür ka temang inoktsü, ta Israel Ato Kilonser Benjamin Netanyahu-i Hokulbarnü ashi.

Hamas-i iba indang telangzüba agüja mali mesüra IDF-ia tebur chanu tem ya kiralongrar temi pua lia November 2023 nung tepset ta meshiteter, ta itdangiter aser forensics ajanga ashir.

Tanur aser tetsü ya Israel-i November 2023 nung bomb pokloksüdang tepset, ta Hamas-i taoba mapang shia liasü.

Israel-i Shiri tasü mang den tanüngba hostages tem meyipa meshir.

"Shiri den tanüngba hostages- takum alir aser sür alir - tem kidangi bener shilangtsü atema temulungtetba nung inyaktü aser Hamas-i agreement nung aibelenba taa ajunga agidaktsütsü," ta Netanyahu-i ashi.

IDF ajanga X nung ashiba agi, "Jangjaba maparen inyakdang tasü mang ka ya Shiri Bibas indang masü ta jangjatet aser dangar hostage kata dena meputeper. Ibai mejangjaba nisung tasü mang lir."

"Ibai Hamas kiralongrari tamajungtiba yimya nung aibelenba lir, shirnoki agreement kübok parnoki pua

bener aoba nisung tasü mang pezü meyiptsütsü shia liasü. Hamas dang Shiri den tanüngba hostages ajunga meyiptsütsü akhanger."

Agreement liaka aser teimla tulu liaka tanurtem tetsü Shiri memeyiptsüba osang angazüka onok aoksa aser süngmang, ta Hostages and Missing Families Forum ajanga ashi.

Shiri, Ariel aser Kfir Bibas nung ya arishi küm 32, pezü aser ita toku lia Hamas-i October 7, 2023 nü Israel amakdang pua bener ao. Israel nung nisung aika atema parnok ya temaitsü ka akum aser parnok asüba osang angashia mangyima liasü.

Tanurtem tebu Yarden Bibas, 34, ya Hamas-i February 1 nü chiok.

Brehostibarnü meyiptsüba tasü mang pezü buba ya veteran peace activist Oded Lifshitz liasü ta Israel-i jangjaogo.

Pua alirtem tasü mang meyipa agütsütsü ya January 19 nungi tenzükba ceasefire nung shilem ka ama mulungteper liasü, aser Israel-i tasü mang ti angutsü imlar ta shia lir.

Israel aser Hamas tsüngta hopta trok atema mezüng ceasefire züngzüktepba tatem tashinung Hamas-i pua bener oa aliba nisung 33 den Palestine nung Israel tepuokdak aliba nisung 1,900 shi den melenteptsü mulungtepa lir.

Ceasefire noklem tanabuba atema jembishinü ya iba ita tetenzüklen tenzüktsü liasü, saka ano metenzük aser iba mapang takum alir hostages tanüngba chioktsü aser rara ya teti atema tembangtsü.

Tang tashinung Hamas-i pua bener aor nisung 28 aser Palestine nung tepuokdak alir 1,000 dak tema melentepe lir.

October 7 nü pua bener aortem rongnung ano nisung 66 tang tashi Gaza nung lir. Ano küm ter shi jakdang pua bener aoba nisung asem tang

tashi mechioki lir. Tang tashi Gaza nung aliba hostages ya tesadang ka shi takum alitsü ta amanger.

Hamas-i October 7, 2023 nü amakdang civilian timba sür nisung 1,200 shi tepset aser nisung 251 pua bener Gaza-i ao. Iba azüdokshi nung telangzüba agüja Israel-i Hamas anema military campaign tesashi tenzüka civilian tem timba sür Palestine nung 48,297 tepset, ta Hamas meyong health ministry ajanga ashir.

Brehostibarnü sa Tel Aviv south tsütsü Bat Yam nung bus asem poksa aser ibai kiralongrar mapa südi ta Israel police temi ashir.

Ano bus ana nung tapoktsü oset yua aliba mapok, ta parnoki ashi aser temulung melema alirtem bushiba mapang lir. Iba lendong nung nisung asü-amaba mali.

Iba lendong atalokba sülen Israel Ato Kilonser Benjamin Netanyahu-i IDF dang West Bank nung kiralongrar tesepe amaktsü totuyuba agütsüogo ta pa indang office ajanga sangdong.

Zelensky-i ali rongsen atema tezüngzüktep yanglutsüla: Mike

Washington, Tsüklai/February 21 (Agencies): US-i Ukraine indang tongtipang ali rongsen agitettsü atema Tir Volodymyr Zelensky jembishinüba langpangi arua tezüngzüktep yanglutsü nüngdaker, ta White House National Security Adviser Mike Waltz-i ashi.

US-i "rare earth minerals" shilem ka meshiba Zelensky-i Bodhbarnü magizük, kong tezüngzüktep ka yanglua Rusia den raraba mapang Ukraine nem US-i teyari agütsüba sen Trump-i meyipa aginer.

Brehostibarnü White House nung osangbener senden ka nung iba o jembiba ya Kyiv nung Zelensky aser US chief envoy to Ukraine, Keith Kellogg tsüngta senden amendanga jembia liasü.

Hopta tetenzüklen Zelensky-i US Tir Donald Trump mezüngmeshi o jembiba atema White House kanga tezü tanger lir, ta Waltz-i ashi.

Ukraine nung lithium aser titanium densema mijang, gas, totzü aser uranium ama

tongtipang ali rongsen sen dollar billion aika jenjang lir.

US-i Ukraine nung item ali rongsen agitetra teyari den melenteptsü akok, mesüra US-i teyari agütsür aliba melen amai amshitetsü, ta Waltz-i Brehostibarnep shia liasü.

"Asenoki Ukraine nung nem maongka tajung agütsü aser ibai Ukraine-i imlaba ama security guarantee tajungtiba alitsü," ta US National Security Adviser-i ashi.

Saka Zelensky-i iba maongka agizüktsü memulunger aser "Ni ozü linük meyoktettsü," ta ashi.

Kyiv nung Zelensky-i Kellogg den senden amenba tembanga Ukraine leniri Ukraine nung rara tembangtsü asoshi US den "investment and security agreement" yanglutsü renema lir, ta sangdonger mapang tatsüka tsüngta Waltz-i White House nungi osangbener dang iba o ya shia liasü.

Zelensky-i iba senden nung tajangzük liasü ta ashi. Donald Trump indang team nungi lenirtem Moscow den indang-

indanga jembishinü tenzükogo, aser Kellogg-i Kyiv nung angatsü atema ao ta ashi.

Aser pai mejembitettsü ta tejangja metet, kechiaser osangbener senden ka agitsü aliba mapangtong nung thitsü.

Kyiv asoshi Kellogg den senden amenba ya kanga tongtipang liasü, kechiaser ketdangsür temi Washington dang shinüba o ajak special envoy dang ashir.

Ukraine tiri X nung post ka lemsatepba nung US special envoy tena tongpang tensa, prisoners of war meyipa arudaktsütsü aser security guarantees indang jungjunga jembishinü ta ashi.

"United States tir den investment aser security agreement tashi tait aser tajung agitsü Ukraine renema lir," ta pai ashi.

Brehostibar nikongdang Zelensky-i Canada, Finland, Norway aser South Africa lenirtem den jembigo ta ashi. "Ukraine medeni Ukraine indang kecha mali," ta pai X nung zülü.

BAPTIST HIGHER SECONDARY SCHOOL MANGKOLEMBA

TEACHER VACANCY

For the Post of Tourism & Hospitality

REQUIREMENTS:

- Master of Hotel Management and Catering Technology or Bachelor of Hotel Management, Travel & Tourism or Diploma in Hospitality & Tourism Management
- Experience in Food and Beverage Service/Classified Hotel/Facility Management Company preferred
- Basic communication skills (oral and written) with basic computing skills

Interested candidates can mail your resume to **bhss_mba@yahoo.co.in** or contact **7005946609/9148087270** on or before **7th March, 2025**.

MULUNGNEN O



S. Marwati Jamir (Mangmetong)

ASO: 04.12.1962 - ASÜ: 18.02.2025

Onoki teti meima aliba Asür S. Marwati Jamir mapang talangka shiranga arudang aser 18/02/2025 nü onok nungi pila aodang ozü den nübu, sarasadem aser rongsen agi yaritepba kinunger, kidanger, arogo züngsem, tembar, loktitentet balala aser kija-kibongshia dang ozü mulung taroktiba nungi pelaba lemsateper. Nenok kija shia dang ozü pelaba melemsatetba atema kanga sasar, saka asen Tulusang Tsüngremi nenok ajak mulamushia moajang ta ozü sarasadem.

Temeim Kinungtsü, Chirnur, Anük-apang aser Kinungertem.

Andreeva-i Swiatek tsükdaktsü

DUBAI TENNIS C'SHIP

Dubai, Tsüklai/February 21 (Agencies):

Brehostibarnü arishi küm 17 tain Mirra Andreeva-i second seed Iga Swiatek madak takok ngua Dubai Championship semifinals atonger rongnung tanutsütila kumogo.

Russia tsür Andreeva-i iba asaya ya ghonda ka sür minute 36 nung 6-3, 6-3 agi takok ngua maneni Dubai nung asayar tajungtem madak takok nguyonga otar.

Taoba küm French Open semi-finals tongtetla rank 14 buba nung alila Andreeva ya 2007 küm Nicole Vaidisova sülen top 10 nung alir pongu tashi akoker asayar rongnung tanutsütila alitsü.

Taoba küm Cincinnati nung tena ajurutepdang Swiatek-i kanga meranga asaya set ka agi tajemba aliba nungi tasembuba set nung 7-5 agi akok.

"Taoba mapang kena kasa toktepa asaya aser kanga tasak liasü. Tan asaya nung ni küsasa azüiktsü, tera sashia asayatsü aser nungnanga malitsü merang. Ibaji ajanga akok südi ta bilemer," ta Andreeva-i ashi.

Andreeva-i la ain adokba azüoktsü asoshi psychologist den shisa agiteper ta ashi.

Grand Slam ponguben



Mirra Andreeva

nguteta alika Swiatek-i break points tenet ngutetaka takok mongutet.

Iba asaya nung Poland tsür Swiatek-i unforced errors 33 tashi menaa liasü.

"Mirra ya asayar tajung. Küna Cincinnati nung asayadang yongi ni aji ngur liasü. Ni mejungi asayar alinung la madak nisa takok angutsü ta masü," ta arishi küm 23 tain Swiatek-i ashi.

Taoba hopta Qatar Open nung Swiatek ya semi-finals atong, saka Jelena Ostapenko-i tsükdaktsü.

Swiatek ama seed asemububa nung alila Coco Gauff ya iba asayamung tenzüka asayaba nung tsük, world No. 1 Aryna Sabalenka, fourth-seeded defending champion Jasmine Paolini aser 5th seed Jessica Pegula nungera tsüka liasü.

Andreeva ya seed 6 buba nung alila Elena Rybakina

den asayatsü aser taoba mapang Wimbledon champion yagi United States nungi Sofia Kenin madak 6-2, 7-6 (7/2) agi takok ngua semi-final ya tongtet.

Tematiba jenjang nung alirtem tang tashi iba asayamung nungi metsüki alibaji Rybakina ya kisüng lir.

Denmark tsür rank 38 buba nung alila Clara Tauson, shibai last 16 nung Sabalenka tsükdaktsü, lai Czech tsür Linda Noskova madak 7-6 (7/4), 6-4 agi takok ngua semi-finals tonggogo. Linda Noskova yagi Pegula tsükdaktsü liasü.

Tauson asoshi ibai mezüngbuba WTA 1000 semi-final alitsü, kong lai Czech Republic tsür 17th seeded Karolina Muchova den asayatsü. Muchova-i Romania tsür Sorana Cirstea madak 6-2, 7-5 agi quarter-final nung takok ngua liasü.

Real aser Atletico, Liverpool aser PSG asayatsü

Nyon, Tsüklai/February 21 (Agencies): Champions League round of 16 indang draw Nyon, Switzerland nung asayaba nung club tulutem ajuruteper.

Defending champion Real Madrid-i Bodhbarnü 2023 asayamung akoker Manchester City tsükdaktsüba sülen Atletico Madrid den asayatsü, koba parnoki 2014 aser 2016 finals nung parnoki koka lir.

Bayern Munich ya Bayer Leverkusen den atar - tena ya ka Bundesliga nung tematiba jenjang nung lir aser ka defending champion lir. Tena taoba hopta tatemlen asaya 0-0 nung tembang.

Taoba ita 36-team standings nung tematiba jenjang nung aliba Liverpool ya Hokulbarnü draw nung PSG den asayatsü lemezük.

Liverpool aser PSG ya Champions League mesüra tejenba European Cup indang knockout stage nung kodanga majuruteper. Telok

ana tesüsa asayaba ya 2018-19 group stage nung liasü aser iba küm Liverpool-i European Cup title trok buba bena tembang.

Leg games mezüngbuba ya March 4-5 nung asayatsü aser hopta ka lir return games asayatsü.

CHAMPIONS LEAGUE

Ano Barcelona ya Benfica den ataogo, shirnok ita ka tejakdang Lisbon nung parnoki 5-4 agi akok aser Arsenal ya PSV Eindhoven den asayatsü aser Inter Milan ya Feyenoord den asayatsü.

Club Brugge ya Aston Villa den asyatsü aser Borussia Dortmund ya Lille

Champions League last 16 draw yamai alitsü:
Club Brugge (Belgium) vs Aston Villa (England)
Borussia Dortmund (Germany) vs Lille (France)
Real Madrid (Spain) vs Atletico Madrid (Spain)
Bayern Munich (Germany) vs Bayer Leverkusen (Germany)
PSV Eindhoven (Netherlands) vs Arsenal (England)
Feyenoord (Netherlands) vs Inter Milan (Italy)
Paris Saint-Germain (France) vs Liverpool (England)
Benfica (Portugal) vs Barcelona (Spain).

den asayatsü.

Champions League format tejenba nungbo Madrid aser German ya majuruteptsü liasü, kong linük kasa nungi team tem round of 16 nung majuruteper. Saka tang tennis-style tasenba yagi yamaji asayatsü melar, anungji league phase nung asayar alirtema last 16 nung ajuruteper.

Kasaji quarterfinals aser semifinals nunga shir den asayatsüa jangjar, kechiaser Liverpool aser PSG na asayaba nung takoker ya Villa aser Brugge tsüngta takok angur den asayatsü. Madrid ana asayaba nung takok angur ya PSV Eindhoven mesüra Arsenal ajurutsü.

Nagaland Super League mezüngbuba round temogo

Dimapur, Tsüklai/February 21 (TYO): Nagaland Super

League football asayamung round mezüngbuba tembangogo aser tanabuba round ya February 26, 2025 nü nungi tenzüka Chümoukedima Football Stadium aser Indira Gandhi Stadium, Kohima nung asayatsü.

Shilem agiba team, fans aser teyariteper temi tejangraba tulu nung shilem agiba atema pelaba lemsateper. Nenoki iba asaya sapuba ajanga tang tashi iba league jangratema asaya

arutagi, ta NSL Media Team sangdong ka ajanga ashi.

Tan season noklem tanabuba asoshi onoki renemshiba mapang, asaya tajungba angutsü yongya atar aser media aser football jangrar tem dang maneni iba league yaritsü ayongzüker, ta ashi.

NSL indang Social Media accounts tem INSTAGRAM: n.s.l_Official, YOUTUBE: Nagaland Super League, X: NSLOfficial2024 aser FACEBOOK: Nagaland Super League alitsü.

Reliance Foundation ajanga tetsür asoshi football workshop ayonger

Srinagar, Tsüklai/February 21 (Agencies): Reliance Foundation Youth Sports (RFYS) ajanga February 21, 2025 nü Srinagar nungi tenzüka Women's Football Referees Workshop ayonger, koba All India Football Federation (AIFF) den lungjemer ayongzüker alitsü.

India tesem balala nungi tetsür match officials 170 dak tema nem training balala agütsütsü nukjiding nung iba sentong ya ayonger. Iba workshops ya Srinagar nung February 21-22 alitsü aser Kolkata nung March 1-2, Shillong nung March 8-9, Chennai nung March 15-16 aser Mumbai nung March 19-20 nung ayongzüksü.

Senior Indian women's football team player Ngangom Bala Devi-i, "Referee mapa ya kanga tasak aser Indian football nung asaya shidak asayadaktsütsü asoshi inyakba asaya ketdangsür ajunga ni akumtsübor. Reliance Foundation ajanga AIFF den lungjemer asaya ketdangsür ajangzüksün asoshi workshop ayongzüka ajanga national aser international jenjang nung ketdangsütsü tashi tali agütsütsü. Indian football terenlok asoshi iba ama mapa teti ayongzüka ngua ni kanga pelar," ta ashi.

Workshop shia kidanger region tem nungi asaya ketdangsürtem arua shilem agitsü. Tatishitsü agi, Srinagar session nung Chandigarh, Punjab, Jammu, Himachal Pradesh aser anasa aliba tesemtem nungi arua shilem agitsü. AIFF instructors mongin temi anir iba workshops ya agitsü aser yangji Uvena Fernandes - India nunger assistant referee tem rongnungi FIFA World Cup final ketdangsüba pa kisüng lir - Maria Rebello, taoba mapang Indian women's national team captain aser FIFA-i shima aliba referee, nunger dena alitsü.

India nunger tetsürtem football asayaba tsütsü kanga renlokogo ase asayar, coaches aser asaya ketdangsür shilem agiba tetsür tali kumogo. Tan season RFYS aser Reliance Foundation Development League (RFDL) nung asaya ketdangsür tetsür 40 shi dena liasü.

November 2024 nung RFYS ajanga Indian Women's League (IWL) match officials asoshi workshop ka ayongzüka liasü. 2022 küm nungi RFYS yagi AIFF aser danga tongtipang partners den lungjemer iba mesük workshop ayongzüka ajanga coaches aser tetsür asaya ketdangsür 620 dak tema tajangzüku nguogo.

BILEMDANGANG

"Tekolok tilar tem tia majung nem anisadaktsür."